

四庫全書

集部

欽定四庫全書

集部  
唐詩紀事卷五十八至六十

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚臧

謄錄監生臣劉能

欽定四庫全書

唐詩紀事卷五十八

宋 計敏夫 撰

溫庭皓

韋蟾

李敬芳

李湜

李郢

韓琮

劉滄

柳棠

賀蘭朋吉

崔珏

李洞

長孫翺

崔櫓

曹唐

于武陵

霍揔

劉魯風

盧尚卿

溫庭皓

尚書東苑公鎮襄陽成式庭皓蟾皆其從事工元唱和  
詩各三篇成式詩云風杪影凌亂露輕光陸離如霞散  
仙掌似燒上峨嵋道樹千花發扶桑九日移因山成衆  
象不復藉蟠螭

踴出多寶塔往來飛錫僧分明三五月傳照百千燈馴  
狖移高柱慶雲遮半層夜深寒焰白猶自綴金繩

磊落風初定輕明雲乍妨疎中搖月彩繁處雜星芒火  
樹枝柯密燭龍鱗角張窮愁讀書者應得假餘光

庭皓詩云一峰當勝地萬點照嚴城勢異崑岡發光疑  
玄圃生焚書翻見字舉燧不招兵況遇新春夜何勞秉  
燭行

九枝應並耀午夜思潛然景集青山外螢分碧草前輝  
華侵月影歷亂寫星躔望極高樓上搖光滿綺筵

春山收暝色燭火集餘輝麗景饒紅焰祥光出翠微白  
榆行自比青桂影相依唯有偷光客追遊欲忘歸

庭皓咸通中為徐州崔彥曾幕府龐勛反以忤脇庭皓

使為表求節度使倨答曰我豈以筆硯事汝耶其速殺  
我遂遇害庭皓梅詩云一樹寒林外何人此地栽春光  
先自煖陽艷暗相催曉覺霜添白寒迷月借開餘香低  
惹袖墮蘂逐流杯零落移新暖颺揚上故臺雪繁鸞不  
識風裊蝶空迴羗吹應愁起征徒異渴來莫貪題詠興  
商鼎待鹽梅

韋蟾

上元唱和詩云新正圓月夜尤重看燈時累塔嫌沙細

成文訝筆遲歸牛疑燧落過鴈悞書遺生惜蘭膏燼還  
為隔歲期

舉燭光纔起揮毫勢競分點時驚墜石挑處接崩雲辭  
異秦丞相銘非寶冠軍唯愁殘焰落逢玉亦俱焚

多寶神光動生金瑞色浮照人低入郭伴月夜當樓熏  
穴應無取焚林固有求夜闌陪玉帳不見九枝留

蟾廉問鄂州罷賓僚祖餞蟾曾書文選句云悲莫悲兮  
生別離登山臨水送將歸以牋毫授賓從請續其句遂

巡有妓泣然起曰某不才不敢染翰欲口占兩句韋大驚異令隨念云武昌無限新栽柳不見楊花撲面飛座客無不嘉歎常令唱作楊柳枝詞

蟾為左丞至長樂驛見李湯給事題名題其側曰渭水秦山照眼明希仁何事寡詩情只應學得虞姬媚書字才能記姓名

蟾字隱珪下杜人大中七年進士登第初為徐商掌書記終尚書左丞梅詩云高樹臨溪艷低枝隔竹繁何須



是桃李然後欲忘言擬折菟先斷須看眼更昏誰知南  
陌草却解望王孫

題僧壁云一竹橫簷挂淨巾竈無烟火地無塵剃頭未  
必知心法要且閑於名利人段成式和云有僧支頰撫  
眉毫起就夕陽磨剃刀到此既知閑處樂俗心何啻九  
牛毛

送盧潘尚書之靈武云賀蘭山下果園成塞北江南舊  
有名水木萬家朱戶暗弓刀千隊鐵衣鳴心源落落堪

為將膽氣堂堂合用兵却使六番諸子弟馬前不信是書生

贈商山僧云商嶺東西路欲分兩間茅屋一溪雲師言耳重知師意人是人非不欲聞

李敬芳

天台閣望云天台十二旬一片雨中春林果垂楊盡山苗半夏新陽烏暗展翅陰魄夜飛輪坐冀無雲物分明見北辰勸酒云不向花前醉花應解笑人只憂連夜雨

又過一年春

聞高侍郎卒貶所云京西高院長直氣似吾徒走馬論  
邊備飛聲感廟謨官移人未察身沒事多符寂寞他年  
後名編野史無

遣興云果窺丹竈鶴莫羨白頭翁日月仙壺外筋骸藥  
臼中雲歸無定所鳥跡不留空何必勞方寸峴崎問遠  
公

汴河直進船云汴水通淮利竄多生人為害亦相和東

南四十三州地取盡脂膏是此河

字中虔登長慶進士第大和中為歙州刺史大中時顧  
陶集唐詩類選云李歙州敬方才力周備興比之間獨  
與前輩相近家集三百首簡擇律韻八篇而已雖前後  
變絕或畏多言而典刑具存非敢避棄

李溟

喬木掛斗色水驛壞門開向月片帆去背雲行鴈來晚  
年名利跡寧免路岐哀前計不能息若為玄鬢迴

無題溟

以是詩得名張為取作主客圖

賈島送溟謁宥州李權使君云英雄典宥州迢遞苦吟  
遊風宿驪山下月斜灞水流去時初落葉迴日定無秋  
太守携才子看鵬百尺樓

李郢

重陽日寄浙東諸從事云野人多病門長掩荒圃重陽  
菊自開愁裏又聞清笛怨望中難見白衣來元瑜正及  
從軍樂寧戚誰憐叩角哀紅旆紛紛碧江暮知君醉下

望鄉臺

奉陪裴相公重陽日游安樂池亭云絳霄輕靄翊三台  
嵇阮情懷管樂才蓮沼昔為王儉府菊籬今作孟嘉盃  
寧知北闕元勲在漢賜蕭何等北闕大第却引東山舊客來自笑  
吐茵還酩酊日斜空從絳衣迴

和湖州杜員外冬至日白蘋州見憶云白蘋亭上一陽  
生謝眺新裁錦繡成千嶂雪銷溪影綠幾家梅綻海波  
清已知鷗鳥長來狎可許汀洲獨有名多愧龍門重招

引即拋田舍棹舟行

贈羽林將軍云虬髯顙頰羽林郎曾入甘泉侍玉皇鵬  
沒夜雲知御苑馬隨仙仗識天香五湖劫去孤舟月六  
國平來兩鬢霜唯有桓伊江上笛卧吹三弄送殘陽  
上裴晉公詩云四朝憂國鬢如絲龍馬精神海鶴姿天  
上玉書傳詔夜陣前金甲受降時曾經庾亮三秋月下  
盡羊曇兩路碁惆悵舊堂扃綠野夕陽無限鳥飛遲

江亭春霽云江籬漠漠荇田田江上雲亭霽景鮮蜀客

帆檣背歸鷺楚山花木怨啼鵲春風掩映千門柳晚色  
凄寒萬井烟金磬泠泠水南寺上方僧室翠微連

寒食遠望云舊墳新隴哭多時流世都堪幾度悲烏鵲  
亂啼人未遠野風吹散白棠梨

七夕寄張氏兄弟云新秋牛女會佳期紅粉筵開玉饌  
時好與檀郎記花朵莫教清曉羨蛛絲

七夕云烏鵲橋頭雙扇開年年一度過河來莫嫌天上  
稀相見猶勝人間去不回欲減烟花饒俗世暫煩烟月



掩粧臺別時舊路長清淺豈肯離心似死灰

中元夜詩云江南水寺中元夜金粟欄邊見月娥紅燭  
影迴仙態近翠環光動見人多香飄彩殿疑蘭麝霧遶  
輕衣雜綺羅湘水夜空巫峽遠不知歸路欲如何

字楚望大中進士終於御史

郢有詩云江風徹曙不成睡二十五聲秋點長最為警  
絕劉光遠載於金華子

李義山汴上送郢之蘇州云人高詩苦滯夷門萬里梁

王有舊園烟幌自應憐白紵月樓誰伴詠黃昏露桃塗  
頰依苔井風柳誇腰住水村蘇小小墳今在否紫蘭香  
逕與招魂

杜牧之湖南正初招郢云行樂及時時已晚對酒當歌  
歌不成千里暮山重疊翠一溪寒水淺深清高人以飲  
為忙事浮世除詩盡強名看着白蘋芽欲吐雪舟相訪  
勝閑行

方千贈李郢端公非唯孤峭與世絕吟處斯須能變通

物外搜羅歸大雅  
毫端剪削有餘功  
山川正氣侵靈府  
雪月清輝引惠風  
別得人間上昇術  
丹霄路在五言中  
郢子興字魯珍生於南海  
尤能詩每一篇成必贈炙人口  
後登甲科

韓琮

春愁篇云金烏長飛玉兔走  
青鬢長青古無有  
秦娥十六語如弦未解  
貪花惜楊柳  
吳魚嶺鴈無消息  
水盼蘭情別來久  
勸君年少莫遊春  
暖風遲日濃如酒

詠馬云曾經伯樂識長鳴不似龍行不敢行金埒未登  
嘶若是鹽車猶駕瘦何驚難逢王濟知音癖欲就燕昭  
買駿名早晚飛黃引同阜碧雲天上作鸞鳴

暮春送客云綠暗紅稀出鳳城暮雲樓閣古今情行人  
莫聽宮前水流盡年光是此聲

駱谷晚望云秦川如畫柳如絲去國還鄉一望時公子  
王孫暮來好嶺花多是斷腸枝

二月二日遊洛源云舊苑新晴草似苔人還香在踏青

開今朝此地成惆悵已後逢春更莫來

公子行云紫袖長衫色銀蟬半臂花帶粧盤水玉鞍綉  
生雲霞別殿承恩澤飛龍賜渥注控羅青裊轡鏤象碧  
熏葩意氣催歌舞闌珊走鈿車袖障雲縹緲釵轉鳳歌  
斜珠卷迎歸箔紅籠晃醉紗唯無難夜日不得似仙家  
字代封大中中為湖南觀察使待將士不以禮宣宗時  
為都將石載順等所逐

劉滄

中秋夜翫月詩云中秋朗月靜天河烏鵲南飛客恨多  
寒色滿牕明枕簟清光凝露拂烟蘿桂枝斜漢流靈魄  
蘋葉微風動細波此夜空庭聞木葉蒹葭霜積鴈初過  
與僧話舊云中烏同時下翠微舊遊因話事多違南朝  
古寺幾僧在北嶺空林唯鳥歸莎徑晚烟凝竹塢石池  
香色染苔衣此來相見又相別即是關河朔雁飛

經煬帝行宮云此地曾經翠輦過浮雲流水竟如何香  
消南國美人盡怨入東風芳草多殘柳宮前空露葉夕

陽川上浩烟波行人遙起廣陵思古渡月明聞棹歌

咸陽懷古云經過此地無窮事一望淒然感廢興渭水  
故都秦二世咸陽秋草漢諸陵天空絕塞聞邊雁葉盡  
孤村見夜燈風景蒼蒼多少恨寒山半出白雲層

長洲懷古云野燒空原盡狄灰吳王此地有樓臺千年  
事往人何在半夜月明朝自來白鳥影從江樹沒清猿  
聲入楚雲哀停車日晚薦蘋藻風靜寒塘花正開

滄字蘊靈大中進士也

柳棠

東川柳棠應進士舉才思優贍楊尚書汝士作鎮日以  
一巨魚飲之棠不即飲楊公以詩戲之曰文章謾道能  
吞鳳盃酒何曾解喫魚今日梓州張社會應須遭這老  
尚書棠曰未向燕臺逢厚禮幸因社會接餘歡一魚喫  
了終無愧鷗化為鵬也不難初棠與馮戡善棠及第後  
戡與詩曰桃花浪裏成龍去竹葉山頭退鷁飛棠每於  
東川席上狂縱日甚詩忤楊公云莫言名位未相儔風



月何曾阻獻酬前輩不須輕後輩靖安今日在衡州靖  
安李宗閔尚書與楊公中外昆弟東川益怒為書讓其  
座主高錡侍郎曰柳棠者克悖器傲識者惡之校過  
仲容才非犬子且膺門之貴豈宜有此生乎二公以書  
往返詰難棠不任憂惕其後叅越雋軍事而卒

賀蘭朋吉

客舍喜友人相訪云荒居無四隣誰肯訪來頻古樹秋  
中葉他鄉病裏身鴈聲風送急螢影月流新獨為成名

晚多慙見友人

賈島寄朋吉云往往東林下花香似火焚故園從小別  
夜雨近秋聞野菜連寒水枯株簇古墳泛舟同遠客尋  
寺入幽雲斜日扉多掩荒田徑細分相思蟬幾處偶坐  
蝶成群會宿曾論道登高省議文苦吟遥可想遶葉向  
紛紛島又有夜喜賀蘭三見訪詩云漏鐘仍夜淺時節  
欲秋分泉聒樓松鶴風除翳月雲踏苔行引興枕石卧  
論文即此尋常靜來多祇是君

崔珣

岳陽樓晚望云乾坤千里水雲間  
釣艇如萍去復還  
樓上北風斜卷席湖中西日倒銜山  
懷沙有恨騷人  
往鼓瑟無聲帝子閑  
何事黃昏尚凝睇  
數行烟樹接  
荆蠻

哭李商隱云成紀星郎字義山  
適歸黃壤抱長歎  
詞林  
枝葉三春盡學海波瀾  
一夜乾風雨已吹燈  
燭滅姓名  
長在齒牙寒應遊物外  
攀琪樹便著霓裳上玉壇

水精枕云千年積雪萬年冰掌上初擎力不勝南國舊  
知何處得北方寒氣北中凝黃昏轉燭螢飛迢白日褰  
簾冰在簷斲蜀琴相對好裁詩乞與滌煩襟

鷺鷥云翠鬢紅毛舞落暉水禽情似此禽稀暫分烟島  
猶回首祇過寒塘亦並飛映霧乍迷金殿冷逐梭齊上  
玉人機採蘭無恨蘭橈女笑指中流羨爾歸

珏作太魏公幕與副車袁克常侍不叶公俱薦之於朝  
珏拜芸閣讐校會有客以絲桐詣公心善之欲振其名

命以所乘馬迎珏賞之公為客請一篇珏因以發其憤  
詩云七條絃上五音寒此藝知音自古難唯有河南房  
次律始終憐得董庭蘭

公大  
志

珏字夢之登大中進士第

李義山送珏往西川云年少因何有旅愁欲為東下更  
西遊一條雪浪吼巫峽千里火雲燒益州卜肆至今多  
寂寞酒爐從古擅風流浣花牋紙桃紅色好好題詩詠  
玉鉤

李洞

上崇賢曹郎中云閑坊宅枕穿宮水聽水分衾盡蜀僧  
藥杵聲中搗殘夢茶鐺影裏煮孤燈刑曹樹陰千年井  
華岳樓開萬里水詩句變風官漸緊夜濤春盡海邊藤  
子規詩云萬古瀟湘波上雲化為流血杜鵑身長疑啄  
破青山色只恐啼穿白月輪花落玄宗歸蜀道雨飛工  
部宿江津聲聲猶恐聒君耳不見千愁一甌塵

洞唐諸王孫也常遊西川慕賈浪仙為詩鑄銅像其儀

事之如神洞為終南山詩二十韻句有殘陽高照蜀敗  
葉遠浮涇復曰斨竹烟嵐凍偷湫雨電腥遠平丹鳳闕  
冷射五侯廳贈司空侍郎云馬饑食落葉鶴病曬殘陽  
又曰卷箔清谿月敲松紫閣書又送僧云越講迎騎象  
蕃齋懺射鵬上高僕射曰征南破虜漢功臣提劍歸來  
萬里身閑倚凌雲金柱看形容消瘦老於真復曰藥杵  
聲中搗殘夢茶鐺影裏煮孤燈送人歸東南云島嶼分  
諸國星河共一天時人但誚其僻澁而不能貴其奇峭

唯吳子華深知之子華才力浩大八面受敵以韻著稱  
游及頗攻騷雅嘗以百篇示洞洞曰大兄所示百篇中  
有一聯絕唱西昌新亭曰暖漾魚遺子晴遊鹿引麝子  
華不怨所鄙而喜所許洞三榜裴公第二榜策夜簾前  
獻詩公道此時如不得昭陵慟哭一生休尋卒蜀中裴  
公無子人謂屈洞所致裴公贄也洞慕賈島鑄其像頂  
戴常念賈島佛

北夢  
瑣言

洞終南山詩云關內平田窄東西截杳冥雨侵諸縣黑



雲破九門青暫看猶無暇長栖信有靈古苔先漬斗積  
霧夜昏螢怒恐撞天漏深疑隱地形盤根連北岳轉影  
落南溟窮穴何山出遮蠻上國寧殘陽高照蜀敗葉遠  
浮涇斲竹烟嵐凍偷湫雨電腥閑房僧灌頂浴澗鶴遺  
翎梯滑危緣索雲深靜唱經放泉經鹿睡聞磬得人醒  
踏逐神仙宅敲開洞府扃碁殘秦士局字缺晉公銘一  
谷勢當午孤峰聳起丁遠平丹鳳闕冷射五侯廳萬丈  
冰聲折千尋樹影亭望中仙島動行處月輪馨疊石移

臨砌研膠滌上屏明時獻君壽不假老人星

送僧遊南海云春往海南邊秋閒半路蟬鯨吞洗鉢水  
犀觸點燈船島嶼分諸國星河共一天長空却歸日松  
偃舊房前

賦得送賈島調長江云敲爐吟雪月謫出國西門行傍  
長江影愁深汨水魂筇携過竹寺琴典在花村饑食山  
松子誰知賈傅孫

題維摩暢林居云諸方遊幾膺五夏五峰銷越講迎騎

象蕃齋懺射鵰冷筇和雪倚枯櫟帶雲燒從此西林老  
瞥然三萬朝

鄭谷哭洞詩云自聞東蜀病唯我寂關情若近長江死  
想君勝在生

李生酷愛浪仙詩

瘴蒸丹旄濕燈隔素帷清塚樹

僧栽後新蟬一兩聲

### 長孫翱

長孫翱朱慶餘各有宮詞翱詞曰

一道甘泉接御溝上皇行處不曾秋誰言水是無情物

也到宮前咽不流

朱曰寂寂花時閉院門美人相對泣瓊軒含情欲說宮  
中事鸚鵡前頭不敢言

崔櫓

春晚岳陽城言懷云煙花零落過清明異國光陰老客  
情雲夢夕陽愁裏色洞庭春浪坐來聲天邊一與舊山  
別江上幾看芳草深獨凭欄杆意難寫暮笳鳴軋調孤  
城

華清宮詩云銀河漾漾月輝輝樓礙星邊織女機橫玉  
叫雲清似水滿空霜逐一聲飛

障掩金鷄蓄禍機翠華西拂蜀雲飛珠簾一閉朝元閣  
不見人歸見燕歸

草遮回蹬絕鳴鑾雲樹深深碧殿寒明月自來還自去  
更無人倚玉欄杆

門橫金鎖悄無人落日秋聲渭水濱紅葉下山寒寂寂  
濕雲如夢雨如塵

櫓幕杜紫微為詩櫓才情麗而近蕩有無機集三百篇  
尤能詠物如梅花詩曰強半瘦因前夜雪數枝愁向晚  
天來復曰初開已入雕梁盡未落先愁玉笛吹山鵲詩  
曰雲生柱礎降龍地露洗林巒放鶴天蓮花詩云無人  
解把無塵袖盛取殘香盡日憐櫓有酒失於虔州陸郎  
中肱以詩謝之曰醉時顛蹶醒時羞麴蘖推人不自由  
叵耐一雙窮相眼不堪花卉在前頭出撫言

櫓大中時進士也

山路見花詩曰曉紅初折露香新獨立空山冷笑春  
意自知無主惜恣風吹逐馬蹄塵

岸梅云含情含怨一枝枝斜壓漁家短短籬惹袖尚餘  
香半日向人如訴雨多時初開偏稱雕梁盡未落先愁  
玉笛吹行客見來無去意解帆烟浦為題詩

曹唐

暮春戲贈吳端公云年少英雄好丈夫大家望拜漢金  
吾閑眠曉日聽鷓鴣笑倚春風杖轆轤深院吹笙從漢

婢靜街調馬任奚奴牡丹花外簾鉤下獨凭紅肌拚虎鬚

病馬云綠耳何年別渥洼病來顏色半泥沙四蹄不鑿銀砧裂雙眼慵開玉燭斜墮月兔毛輕斛數失雲龍骨瘦牙槎平原好放無人放嘶向東風首藉花

嘗寓江陵佛寺寺有亭沼唐得句曰水底有天春漠漠人間無路月茫茫明日還坐沼上有二婦人素裳徐步詠所吟詩唐迫而訊之不應未十步而沒數日唐亦殂



竟不成名

簫聲欲盡月色苦依舊漢家宮樹秋

遊仙句

看却龍髯攀

不得九霞零落鼎湖宮

句

一曲哀歌茂陵道漢家天子

墓秋風句誰知漢武無仙骨滿竈黃金成白烟句右張

為取作主客圖

唐字堯賓桂州人初為道士後為使府從事咸通中卒  
作遊仙詩百餘篇其友人曰堯賓曾作鬼詩唐曰何也  
曰水底有天春寂寂人間無路月茫茫非鬼詩而何唐

大嘏遊仙詩今見一絕云靜節先生幾代孫青娥曾接  
玉郎魂春風流水還無賴偷放桃花出洞門唐詩屬對  
清切如鷓鴣思起歌聲動鷓鴣身翻舞袖齊斬蛟青海  
上射虎黑山頭此類頗多

于武陵

孤雲詩云南北各萬里有雲心更閑因風離海上伴月  
到人間洛浦少高一作佳樹長安無舊山徘徊不可駐漠  
漠又東還

客中云楚人歌竹枝遊子淚沾衣異國久為客寒宵頻  
夢歸一封書未返千樹葉皆飛南度洞庭水更應消息  
稀

長信宮云簾涼秋氣初長信恨何如拂黛月生指理髮  
雲滿梳一從悲畫扇幾度泣前魚坐聽南宮樂清風搖  
翠裾

武陵會昌時詩人也

白日不西落紅塵應亦深白青山如有利白石亦成塵

句四海少年路千川無定波  
右張為取作主客圖

霍揔

郡樓望九華歌云樓上坐見九子峰翠雲赤日光溶溶  
有時朝昏變疎密八峰和烟一峯出有時風卷天雨晴  
聚立連連如弟兄陽烏生子偶成數丹鳳養雛同此名  
日日遙看機已靜未離塵躅思真境子明龍駕騰九垓  
陵陽相對空崔嵬玉漿瑤草不可見自有神仙風馬來  
武元衡嘗有送揔詩云瑟絲簫管怨津樓三奏行人醉

不留別後相思江一岼落花飛處杜鵑愁

揔咸通時為池州刺史

劉魯風

魯風江西投謁所知頗為典客所阻因賦一絕曰萬卷  
書生劉魯風烟波萬里謁文翁無錢乞與韓知客名紙  
毛生不肯通

魯風張又新客也又新水記曰予刺九江有客李滂門  
士劉魯風

自貞元後唐文甚振以文學科第為一時之榮及其弊也士子豪氣罵吻遊諸侯門諸侯望而畏之如劉魯風姚崇保柳棠平魯之徒其文皆不足取余故載之者以見當時諸侯爭取譽於文士此蓋外重內輕之牙蘖如李益者一時文宗猶曰感恩知有地不上望京樓其後如李山甫輩以一名第之失至挾方鎮劫宰輔則又有甚焉者矣一篇一韻初若虛文而治亂之萌係焉余以是知其不可忽也

盧尚卿

咸通十一年以龐勛盜據徐州久屯戍卒連年飛輓物力方虛因詔權亭貢舉一年是歲尚卿自至闕聞詔而迴乃賦東歸詩曰九重丹詔下塵埃深瑣文闈罷選才桂樹放教遮月長杏園終待隔年開自從玉帳論兵後不許金門諫獵來今日灞陵橋上過路人應笑臘前迴尚卿至僖宗中和二年始登第於蜀

唐詩紀事卷五十八



欽定四庫全書

唐詩紀事卷五十九

宋 計敏夫 撰

薛瑩

褚載

汪遵

蕭遇

盧渥

李訥

崔元範

楊知至

封彥卿

盧鄴

高湘

盧澹

滕倪

林傑

李明遠

李章武

郭圓

薛逢

張宏靖

附韓察  
崔恭

崔公信  
陸渥

胡証  
高銖

張賈

薛瑩

中秋月云三十六旬盈復缺百年堪喜又堪傷勸君莫  
惜登樓望雲放嬋娟不久長

褚載

雲詩云盡日看雲首不迴無心都大似無才可憐光彩  
一片玉萬里青天何處來賀趙觀文重試及第云一枝  
仙桂兩回春始覺文章可致身已把色絲要上第又將  
彩筆冠群倫龍泉再淬方知利火浣重燒轉更新今日

街頭看御榜大能榮耀苦心人

案觀文乾寧二年崔凝下第八人登第是年命陸長重  
試而觀文為榜首

陸威為郎官載以文投獻數字犯其家諱威因矍然載  
尋以牋致謝曰曹興之圖畫雖精終慙誤筆殷浩之矜  
持太過翻達空函

載字厚之登乾寧進士第

汪遵

五湖詩曰已立平吳霸越功  
片帆高颺五湖風不知戰  
國縱橫者誰似陶朱得始終

澠池云西秦北趙各稱高  
池上張筵列我曹何事君王  
親擊缶相如有劔可吹毛

函谷關云脫禍東奔壯氣催  
馬如飛電勢如雷當時若不  
聽彈缺那得關門夜半開

遵幼為吏許棠應二十餘舉  
遵猶在胥徒善為絕句詩  
而深晦密一旦辭役就貢會  
棠送客至灞漈間遇遵於

途訊曰何事至京遵曰就貢崇怒曰小吏無禮後遵成名五年崇始登第

秦築長城比鐵牢蕃戎不敢過臨洮雖然萬里連雲際爭及堯階三尺高遵長城詩也得名於時

遵宣城人登咸通七年進士第許崇其鄉人也水泉花木好高眠嵩少縱橫滿目前惆悵人間不平事今朝身在海南邊遵題李太尉平泉莊詩也

蕭邁

春詩云南國韶光早春風送牂來水堤烟報柳山寺雪  
驚梅練色鋪江晚潮聲逐渚迴青旗問沽酒何處撥寒  
醅

蕭與韋保衡同年登第保衡以幸進而蕭自標致衡銜  
之既相摘蕭之失敗播州司馬途經三峽月夜賦詩自  
悼懼其見害若有人告曰公其勿憂余當為禁禦蕭後  
為相

盧渥

渥字子章軒冕之盛近代無比伯仲四人咸居顯列乾  
符初母憂服闋渥自前中書舍人拜陝府觀察使弟紹  
前長安令除給事中弟沅自前集賢校理除左拾遺弟  
沼自畿尉遷監察御史詔書疊至士族榮之及赴任陝  
郊洛城自居守分司朝臣已下互設祖筵洛城為之一  
空都人聳觀亘數十里渥題嘉祥驛詩曰交親榮餞洛  
城空秉鉞戎裝上將同星使自天丹詔下雕鞍照地數  
程中馬嘶靜谷聲偏響旆映晴山色更紅到後定知人

易化滿街棠樹有遺風

渥在舉場甚有時稱曾於澹水逆旅遇宣宗微行意其  
貴人欲身避之帝呼與相見乃自稱進士盧渥帝請詩  
卷袖之而去它日對宰臣語及盧渥令主司擢第宰臣  
問渥與主上何階緣渥具陳其由時亦不以為忝  
渥應舉之歲偶臨御溝見一紅葉葉上有絕句置於巾  
箱或呈於同志及宣宗放宮人初下詔許從百官司吏  
獨不許貢舉人盧後一任范陽獲其退宮觀紅葉而吁



藏巾篋驗其書無不驚訝詩曰水流何太急深宮盡日  
閑慙懃謝紅葉好去到人間出本事詩

唐末渥自陝府廉察入朝知舉遇巢寇犯闕不及終場  
趙崇戲之曰出場不生養主司也蓋盧氏未嘗知舉盧  
相携耻之拔為主文卒不果渥終檢校司徒

李訥

李尚書訥為浙東廉使夜登越城樓聞歌曰雁門山上  
雁初飛其聲激切召至曰去籍之妓盛小叢也時察院

崔侍御元範自府幕赴闕庭李餞之命小叢歌餞在座  
各為一絕贈送之崔下句云獨向栢臺為老吏或曰侍  
御鳳閣中書即其程也何老於栢臺請改之崔不可是  
年秋崔鞠獄譙中乃終於栢臺之任訥詩云繡衣奔命  
去情多南國佳人歛翠娥曾向教坊聽國樂為君重唱  
盛叢歌

訥故侍郎建字杓直之子字敦正大中時為浙東觀察  
使卒於兵部尚書

崔元範

元範詩云羊公留宴峴山亭洛浦高歌五夜情獨向栢  
臺為老吏可憐林木響餘聲

元範以監察御史為浙東幕府

楊知至

知至詩云趙燕能歌有幾人為花回雪似含聲頻隨御  
史西歸去誰伴文翁怨九春

知至時為浙東團練判官

會昌四年王起奏五人楊知至

刑部尚書汝士之子源重故相牛僧孺之

孫

鄭朴河東節度使崔永式女婿

楊嚴監察御史發之弟

竇絨故相易直之子有旨

令送所試雜文付翰林重考覆續奉

進旨楊嚴一人宜與及第源重等四人落下知至因以

長句呈同年曰由來梁燕與冥鴻不合翩翩向碧空寒

谷謾勞鄒氏律長天獨遇宋都風此時泣玉情雖異它

日銜環事亦同二月春光正搖蕩無因得醉杏園中

知至字幾之登進士第為宰相劉瞻所善擢累戶部侍

郎

封彥卿

彥卿詩云蓮府纔為綠水濱

庾杲之在王儉幕府似芙蓉泛綠水故有此句

忽

乘驄馬入咸秦為君唱作西歌調日暮偏傷去住人  
卿大中進士第為浙東觀察判官戶部尚書教之子

盧鄴

鄴詩云何郎載酒別賢侯更吐歌珠宴庾樓莫道江南  
不同醉即陪舟楫上京溝

鄴大中四年登第為浙東觀察使

高湘

湘詩云謝安春渚餞袁宏千里仁風一扇清歌黛慘時  
方醕酖不知公子重飛觥唐父子之學三家高錯子湘  
湜子邵子允躬崔郾子瑤唯崔氏相去只二十年咸通  
末路崑作相除不附已者十司戶崔沆涪州李漬繡州  
李藻費州湘高州湘與兄湜不睦湜為中書舍人與崑  
善湘到任憤湜不佑已嘗賦詩曰唯有高州是當家

湘字濬之錯之子為右諫議大夫

盧澥

澥詩云烏臺上客繡衣公共捧天書靜境中桃李不須歌白苧耶溪暮雨起樵風

澥浙東處士也

滕倪

滕倪苦心為新詩嘉聲早播遠之吉州謁宗人太守郎中邁邁每吟其句云白髮不能容相國也同閑客滿頭

生又題鷺鷥障子云映水有深意見人無懼心邁曰魏  
文惜陳思之學潘安褒正叔之文貴集一家之盛如此  
倪逼秋試捧笈告遊留詩為別悵然曰是必不祥倪至  
秋逝於商於館舍聞者莫不傷焉倪詩曰秋初江上別  
旌旗故國無家淚欲垂千里未知投足處前程便是聽  
猿時誤攻文字身空老却返漁樵計已遲羽翼彫零飛  
不得丹霄無路接差池

林傑



林傑字智周幼而秀異言則成文年六歲請舉童子時  
父肅為閩府大將性樂善尤好聚書又妙於手譚當時  
名公多與之交及有是子益大其門廉使崔侍郎于函  
與遷職鄉人榮之傑五歲父携行至王仙君霸壇戲問  
童子能詩乎傑口占云羽客已登仙路去丹爐草木盡  
彫殘不知千載歸何日空使時人掃舊壇父初不謂眇  
歲之作遽臻於此群親益驚異遞相傳諷自此日課所  
為未幾盈軸明年遂獻唐中丞唐既伸幅窺吟聳爾駭

嘆命子弟延入學院時會七夕賦乞巧詩傑援筆曰七夕今宵看碧霄牛郎織女渡河橋家家乞巧望秋月穿盡紅絲幾百條唐嘆曰真神童耳傑又精於琴棋草隸俱自天然不煩師授唐因與賓從碁或全局輸者令罩之勿觸取童子來繼終其事傑必指縱出奇往往返勝曲盡其妙時謂神助後復業詞賦頗振聲問有仙客入壺中賦云仙客以變化隨形逍遙放情處於外則一壺斯在入其中則萬象俱呈飛閣重樓不是人間之狀奇

花異木無非物外之名至九歲謁盧大夫貞黎常侍植  
無不嘉獎尋就賓廡日在宴筵李侍御遠趙支使格深  
所知仰不捨斯須和趙支使詠荔枝詩云金盤摘下排  
朱顆紅殼開時飲玉漿鄭副使立作奇童傳劉制置潼  
為序以貽之至年十七方結束琴書將西邁而殂

李明遠

宣宗時太僕卿韋覲以禱醮之故為女巫誣告帝知其  
冤詔誅巫謫覲潘州司馬李明遠時為監察御史有詩

曰北鳥飛不到南人誰去遊天涯浮瘴水嶺外向潘州  
草木春秋暮猿猱日夜愁定知遷客淚應只對君流

李章武

大和末勅僧尼試經不通者勒還俗章武為成都少尹  
有山僧云禪觀有年未嘗念經今被追試前業棄矣章  
武贈詩曰南宗尚許通方便何處心中更念經好去苾  
芻雲水畔何山松栢不青青諭主者特免試

郭圓

世傳張延賞韋臯持節劔南相代之事頗為延賞之耻  
郭洸濱圓詩曰宣父從周又適秦昔賢雖少出風塵當  
時甚訝張延賞不識韋臯是貴人南部新書云韋臯見  
辱於張延賞崔圓受薄於李彥允皆丈人子壻為西川  
交代

圓會昌中檢校司門外郎為劔南李固言從事

薛逢

子庭珪

逢字陶臣蒲州人會昌進士初與劉瑑交會瑑當國有

薦逢知制誥者瑑猥曰先朝以兩省官給事舍人先治  
州縣乃得除逢未試州執不可乃出刺巴州而楊牧王  
鐸同牒署收輔政逢有詩微辭譏訕收銜之復斥蓬綿  
二州刺史鐸為相又以詩訾鐸云昨日鴻毛萬鈞重今  
朝山嶽一毫輕遂不見齒於秘書監題黃花驛云孤戍  
迢迢蜀路長鳥鳴山館客思鄉更看絕頂烟霞外數樹  
品花照夕陽

元日田家云南村晴雪北村梅樹裏茅簷曉盡開蠻榼

出門兒婦去鳥飛迎路女郎來相逢但祝新正壽對舉  
那愁暮景催長笑士林因管別一官輕是十年迴

賀楊收作相詩云闕下憧憧車馬塵沉浮相次宦遊身  
須知金印朝天客同是沙堤避路人威鳳偶時因瑞聖  
應龍無水謾通神立門不是趨時客始向窮途學問津  
逢命一道士貌真自為贊曰裝造薛逢長一尺五寸於  
是絕筆終未能續一旦忽一羽衣詣門見真讚命筆續  
之云手把金鉞鑿開混沌長揖而去不知所之逢鑿開

混沌賦得名也

漢武帝詞云武帝清齋夜築壇自斟明水醮仙官殿前  
童女移香案雲際金人捧露盤絳節有時還入夢碧桃  
何處更驂鸞茂陵烟雨埋弓劍石馬無聲蔓草寒

張宏靖

宏靖為太原節度使有山亭懷古詩云叢石依古城懸  
泉灑清池高低表丈內衡霍相蔽虧歸田竟何因為郡  
豈所宜誰能辨大野寄適聊在斯



節度判官侍御史韓察和云公府政多暇思與仁智全  
為山想品穴引水聽潺湲見迹自逸塵俗無由牽蒼  
生方矚望詎得賦歸田

節度副使檢校右散騎常侍崔恭和云高情樂閑放寄  
跡山水中朝霞鋪座右虛白貯清風潛竇激飛泉石路  
躋且崇步武有勝槩不與俗情同

恭能文嘗叙  
梁肅文集

觀察判官兼殿中侍御史崔公信和云疊石狀崖巘翠  
含城上樓前移盧霍峰遠帶沅湘流瀟灑主人靜黃緣

芳徑幽清輝在昏旦豈異東山遊

給事中陸漣和云激水瀉飛瀑寄懷良在茲如何謝安  
石要結束山期入座蘭蕙馥當軒松桂滋於焉悟幽道  
境寂心自怡

左金吾衛大將軍胡誼和云飛泉天台狀峭石蓬萊姿  
潺湲與青翠咫尺當幽竒居然盡精道得以書妍詞豈  
無他山勝懿此清軒墀

節度判官監察御史高銖和云閬石類品巘飛流瀉潺

溪遠壑簷宇際孤鸞雉堞間何必到海岳境幽機自閑  
茲焉得高趣高步謝東山

尚書左丞張賈和云中庭起崖谷漱玉下漣漪丹邱誰  
云遠寓象得心期豈不貴鐘鼎至懷在希夷唯當蓬萊

閣靈鳳復來儀

貴宏靖  
從姪也

節度掌書記監察御史李德裕和云崑石在朱戶風泉  
當翠樓始知峴亭賞難與清輝留餘景澹將夕凝嵐輕  
欲收東山有歸志亦接赤松遊

宏靖字元理元和中自宰相出為河東節度使公信登  
元和元年進士第宏靖帥太原辟為掌記後以德裕代  
之

以公信為觀察判官遷登正元元年進士第

証河東人舉進士第元和十三年自振武節度使召任  
金吾大將軍趙宗儒鎮河中証時建節赴振武備桑梓  
禮入謁持刺稱百姓獻趙公詩云詩書入京國旌旆過  
鄉關州里榮之

出因  
話錄

退之奉酬振武胡十二丈大夫詩

云傾朝共羨寵光頻半歲遷騰作虎臣弩矢前驅煩縣

令

一云戎旆暫  
傳辭社樹

里門先下敬鄉人橫飛玉醴家山曉遠

蹠金珂塞草春自笑平生誇膽氣不離文字鬢毛新

恭終汾州刺史銖字權仲既擢第為宏靖幕府後為太

常卿

賈為韋夏卿所知後至達官初以侍御史為華州工以

忘言之句別之曰東簡下高閣買符驅短轅故人惜分

袂結念醉芳罇切切別思纏蕭蕭征騎煩臨歸無限意

相視却忘言

唐詩紀事卷五十九

欽定四庫全書

唐詩紀事卷六十

宋 計敏夫 撰

李節

費冠卿

劉虛白

蕭建

袁不約

孫緯

周祚

崔澹

盧頻

李廓

李頻

賈駘

薛能

曹鄴

裴虔餘

陳陶

李節

會昌季年武宗大剪釋氏巾其徒且數萬人民隸其居

容貌於土木者沉諸水言詞於紙素者烈諸火分命御史乘駟走天下察敢隱匿者罪之由是天下名祠珍宇毀撤如掃天子建號之初雪釋氏之不可廢也詔徐復之而自湖已南遠人畏法不能酌朝廷之體前時焚撤書像殆無遺者故雖明命復許創立莫能得其書道林寺湘川之勝遊也有釋疏言警辯有謀獨曰太原府國家舊都多釋祠我聞其帥司空范陽公天下仁人我第往求釋氏遺文以惠湘川之人宜其聽我而助成之矣



即杖而北遊既上謁軍門范陽公果諾之因四求散逸  
不成蘊帙者至釋祠而不見焚而副剽者又命講丐以  
補繕缺漏者月未幾凡得釋經五千四十八卷以大中  
九年秋八月輦自河東而歸於湘焉喜釋氏之助世既  
言之矣向非我君洞察理源其何能復立之即既立之  
且亡其書非有疏言識遠而誠堅孰克宏之耶吾嘉疏  
言奉君之令演釋之宗不憚寒暑之勤德及遠人為叙  
其事且贈以詩湘川信信兮俗曠且佷利殺業偷兮吏

莫之訓繫釋氏兮易暴使仁釋何在今釋在斯文湘水  
滔滔兮四望何依猿狖騰擎兮雲樹飛飛月沉浦兮烟  
暝山檣席卷兮櫓牀閑偃仰兮嘯詠鼓長江兮何時還  
湘川超忽兮落日晼晼松覆秋亭兮蘭被春苑上人去  
兮幾千里何日同遊兮湘川水

節登大中進士第

費冠卿

閑居即事云生計唯將三尺僮學他賢者隱牆東照眠

夜後多因月掃地春來祇藉風幾處旌旗驅戰士一園  
青草伴衰翁子房仙去孔明死更有何人解指蹤

酬范中丞見惠云花宮柳陌正從行紫袂金鞍問姓名  
戰國方須禮干木康時何必重侯嬴捧將束帛山僮喜  
傳示銀鈎邑客驚直為雲泥相去遠一言知己殺身輕  
秋日與冷然上人寺莊觀稼云世人從擾擾獨自愛身  
閑美景當新霽隨僧過遠山村橋出秋稼空翠落澄灣  
唯有中林犬猶應望我還

題中峰云中峰高柱沕寥天上有茅庵與石泉晴景獵人曾望見青藍色裏一僧禪

蒙召拜拾遺書情二首云拾遺帝側知難得官緊才微恐不勝好是中朝絕親友九華山下詔來徵又云三千里外一微臣二十年來任運身今日忽蒙天子召自慙驚動國中人

桂樹藤云本為獨立難寄彼高樹枝蔓衍數條遠溟濛千朵垂向日助成陰當風藉持危誰言柔可屈坐見蟠

蛟螭

枕流石云不為幽崖隱古色涵空出願以清泚流鑒此  
堅貞質傍臨玉光潤時瀉苔花密往往驚游鱗尚疑垂  
釣日

冠卿字子軍池州人久居京師感懷詩云螢燭不為苦  
求名始辛酸上國無交親請謁多少難九月風到面羞  
汗成冰片求名俟公道名與公道遠力盡得一名他喜  
我且輕家書十年絕歸去知誰榮馬嘶渭橋柳特地起

愁聲登元和二年第母卒既葬而歸嘆曰干祿養親耳  
得祿而親喪何以祿為遂隱池州九華山長慶中殿院  
李行脩舉其孝節拜右拾遺制曰前進士費冠卿常預  
計偕以文中第祿不及於榮養恨每積於永懷邇來屏  
身邱園絕跡仕進守其志性十有五年峻節無用清飈  
自遠夫旌孝行舉逸人所以厚風俗而敦名教也宜承  
高獎以儆薄夫擢參近侍之榮載佇移忠之効冠卿竟  
不應命杜荀鶴有詩吊其墓曰凡弔先生者多傷荊棘

間不知三尺墓高却九華山天地有何外子孫無亦閑  
當時若徵起未必得身還冠卿以拾遺召不起賦詩云  
君親同是先王道何如骨肉一處老也知臣不合佐時  
自古榮華誰可保

姚合嘗寄詩云逍遙繒繳外高鳥與潛魚闕下無朝籍  
林間有詔書夜眠幽洞石曉飯白雲蔬四海人空老九  
華君獨居此心誰復識日與世相疎

李群玉經費拾遺故居云雲卧竟不起少微空損光惟

應孔北海為立鄭公鄉舊館苔蘚合幽齋松菊荒空餘  
書帶草日日上階長

劉虛白

竟陵人劉虛白擢進士第嗜酒有詩云知道醉鄉無戶  
稅任他荒却下丹田出北夢瑣言虛白與盧坦交友坦  
主文虛白於簾前獻一絕云二十年前此夜中一般燈  
燭一般風不知歲月能多少猶着麻衣待至公

蕭建



建與費冠卿同時建寄冠卿云見說九華峰上寺日宮  
猶在下方開其中幽境客難到請為詩中圖畫來冠卿  
答詩云自地上青峰懸崖一萬重踐危頻側足登塹半  
齊冒飛狄啼攀桂遊人喘倚松入林寒痒痒近暴雨濛  
濛徑滑石稜上寺開山掌中幡花撲淨地臺殿印晴空  
勝境層層別高僧院院逢泉魚候洗鉢老獼戲撞鐘外  
戶憑雲掩中厨課水舂搜泥時和麵拾橡半添種渡壑  
緣槎險持燈入洞窮夾天開壁峭透石感波雄澗藹清

無土潭深碧有龍畲田一片淨谷樹萬株濃野客登臨  
慣山房幽寂同寒爐樹根火夏牖竹梢風邊鄙籌賢相  
黔黎託聖躬君能棄名利歲晏一相逢

建登進士第終禮部侍郎

袁不約

不約有深秋之句云愁聲秋遶杵寒色碧歸山又有客  
去之句云送將歡笑去收得寂寥迴張為取二聯於主  
客圖

范櫨云李固言在成都則李珣郎中郭圓員外陳會端  
公表不約侍郎來擇書記薛重詩事皆遠從公可謂蓮  
幕之盛不約登長慶三年第

孫緯

中秋夜思鄭延美有作云中秋中夜月世說惛妖精顧  
兔雲初蔽長蛇誰與勅未追良友翫安用玉輪盈此意  
人誰諭裁詩寄禁城

綿咸通八年宏詞登科

周祚

莫道春花獨照人  
秋花未必怯青春  
四時風雨沒時節  
共保松筠根底塵  
祚以此詩得名張為取作主客圖

崔澹

怪得輕風送異香  
娉婷仙子曳霓裳  
惟憂錯認偷桃客  
曼倩曾為漢侍郎

澹贈美人

太中末崔鉉自平章事鎮淮海

楊收為支使收狀云前時里巷初迎避馬之威今日藩垣便仰問牛之代澹之詞也澹終於吏部侍郎

盧頻

蛺蝶行云東園宮草綠上下飛相逐君恩不禁春昨夜  
花中宿

東西行云種荷玉盆裏不及溝中水養雉黃金籠見草  
心先喜

頻又有春淚爛羅綺泣聲抽恨多莫滴芙蓉池愁傷連  
蒂荷句一朵花葉飛一枝花光彩美人惜花心但願春  
長在句右張為取作主客圖

李廓

夏日途中云樹夾炎風路行人正午稀初蟬數聲起戲蝶一團飛日色欺清鏡槐膏點白衣無成歸故里自覺少光輝

廓李程之子也登元和進士第大中中拜武寧節度使不能治軍補闕鄭魯言新麥未登徐必亂既而軍亂果逐廓按舊史廓有詩名大中末累官至潁州刺史再為觀察使子晝亦登進士第

廓長安少年行云金紫少年郎繞街鞍馬狂身從左中  
尉官屬右春坊剡戴楊州帽重薰異國香垂鞭踏青草  
來去杏園芳

追逐輕薄伴閑遊不着緋長攏出獵馬數換打毬衣曉  
日尋花去春風帶酒歸青樓無晝夜歌舞歇時稀

日高春睡足帖馬賞年華倒挿銀魚袋行隨金犢車還  
携新市酒遠醉曲江花幾度歸侵黑金吾送到家

好勝耽長夜天明燭滿樓留人看獨脚賭馬換偏頭樂

奏曾無歇盃巡不暫休時時遙冷笑怪客有春秋

遨遊携艷妓裝束似男兒盃酒逢花住笙歌簇馬吹鶯  
聲催曲急春色送歸遲不以聞街鼓華筵待月移

賞春唯逐勝大宅可曾歸不樂還逃席多狂慣衩衣歌  
人踏日起語驚卷簾飛婦好唯相妬倡樓不醉稀

戟門連日閉苦飲惜殘春開鎖通新客教姬屈醉人倩  
歌牽白馬自舞蹈紅茵時輩皆相許平生不負身

新年高殿上始見有光輝玉鴈排方帶金鵝立仗衣酒



深和稅賜馬疾打珂飛朝下人爭看香街意氣歸

遊市慵騎馬隨姬入座車樓邊聽歌吹簾外市釵花樂  
眼從人鬧歸心畏日斜蒼頭來去報飲伴到倡家

小婦教鸚鵡頭邊喚醉醒犬嬌眠玉簟鷹掣撼金鈴碧  
地攢花障紅泥待客亭雖然長按曲不飲不曾聽

鷄鳴曲云星稀月沒入五更膠膠角角鷄初鳴征人牽  
馬出門立辭妾欲向安西行再鳴引頸簷頭下月中角  
聲催上馬纔分地色第二鳴旌旆紅塵已出城婦人上

城亂招手夫婿不聞遙哭聲長恨鷄鳴別時苦不遣鷄  
栖近窻戶

鏡聽詞云匣中取鏡祠竈王羅衣掩盡明月光昔時長  
着照容色今夜潛將聽消息門前地黑人來稀無人錯  
道朝夕歸更深弱體冷如鐵綉帶菱花懷裏熱銅片銅  
片如有靈願得照見行人千里形

猛士行云戰鼓驚沙惡天色猛士虬鬚眼前黑單于衣  
錦日行兵陣頭走馬生擒得幽并少年不敢輕虎狼窟

裏空手行

送振武將軍云葉葉歸邊騎風頭萬里乾金裝腰帶重  
錦縫耳衣寒蘆酒燒蓬暖霜鴻撚箭看黃河古城道秋  
雪白漫漫

小說載廓從其父程過三亭渡為小石隱足痛以呼父  
程曰太華峰頭見有仙人手跡黃河灘裏爭得隱人脚  
跟

廓落第詩云榜前潛制淚衆裏自嫌身氣味如中酒情

懷似別人暖風張樂席晴日看花塵盡是添愁處深居  
乞過春

姚合有送李廓侍郎赴夏州詩云酬恩不顧名走馬覺  
身輕迢遞河邊路蒼茫塞上城沙寒無宿鴈敵近少閑  
兵飲罷揮鞭去傍人意氣生

李頻

頻字德新睦州人與里人方干善給事中姚合名為詩  
士多歸重頻走千里丐其品藻合大加獎挹以女妻之

乾符中以工部外郎為建州刺史卒

吳州月夜與曹太尉話別詩云早晚更看吳苑月西齋  
長憶月當窓不知明夜誰家見應照離人隔楚江

送茶山人歸洞庭云却共孤雲去高眠最上峰半湖垂  
早月中路入疎鐘秋盡蟲聲急夜深山雨重當時同隱  
者分得幾株松

湖口送友人云中流欲暮見湘煙蒨岸無窮接楚田去  
鴈遠衝雲夢澤離人獨上洞庭船風波盡日依山轉星

漢通宵向水連零落梅花過殘臘故園歸去及新年

過四皓廟云東西南北人高跡自相親天下已歸漢山  
中猶避秦龍樓曾作客鶴氅不為臣獨有千年後青青  
廟木春

陝下懷歸云故園何處在零落五湖東日暮無來客天  
寒有去鴻大河冰徹塞高岳雪連空獨夜懸歸思迢迢  
永漏中

鄭谷哭建州李員外詩云今歸終故里末歲道如初舊

友誰為誌清風豈易書  
雨墳生野蕨鄉莫釣金魚  
獨夜吟還泣前年伴直廬

羅隱題方干詩云中間李建州  
夏汭偶同遊顧我論佳句  
推君最上流九霄無鶴板  
雙鬢老漁舟世難方如此  
何當浣旅愁

姚合荅頻詩云一年離九陌  
壁上掛朝袍物外詩情遠  
人間酒味高思歸知病長  
失寢覺勤勞衰老無多思  
因君把筆毫

賈駝

秋入關詩云河上微風來關頭樹初濕今朝關城吏又見孤客入上國誰與期西來徒自急

馳唐末人會昌間陸貞洞王滌輩題三鄉詩馳後留贈云壁古字未滅聲長響不絕蕙質本如雲松心應耐雪耿耿離幽谷悠悠望甌越杞婦哭夫時城崩無此說馳有秋入關詩及東風吹曉霜雪鳥雙雙來之句張為取作主客圖



薛能

能字大拙汾州人會昌六年進士大中八年平判入等  
補盤屋尉辟太原陝虢河陽從事李福鎮滑州表觀察  
判官歷侍御史都官刑部員外郎福徙西川取為節度  
副使咸通中攝嘉州刺史歸朝遷主客度支刑部郎中  
俄刺同州京兆尹溫璋貶命權知尹州出領感化節度  
入授工書復節度徐州徙忠武廣明元年徐兵赴澠水  
經許能以前帥徐軍吏懷恩館之州內許軍懼徐人見

襲大將周岌因衆怒遂能自稱留後能全家遇害

能申湖詩云昔年依峽寺每日見申湖下淚重來此知  
心一已無雨霖舟色暗岸拔木形枯舊境深相惱新春  
宛不殊方來尋熟侶起去恨驚鳬忍事花何笑喧吟瀑  
正麓堪憂從宦到倍遣曩懷孤上馬終回首傍人恠感  
吁

謝劉相寄天柱茶云兩串春團敵夜光名題天柱印維  
楊偷嫌曼倩桃無味搗覺嫦娥藥不香惜恐被分緣利

市盡應難覓為供堂僦官寄與真拋却賴有詩情合得  
嘗

獻僕射相公云清如冰玉重如山百辟嚴趨禮絕攀強  
虜外聞應破膽平人長見盡開顏朝廷有道青春好門  
館無私白晝閑致却垂衣更何事幾多詩合詠關關

從事蜀川日每短諸葛功業其詩曰流運有功終是撓  
陰符多術得非姦又云陣圖誰許可廟貌我揶揄又云  
焚却蜀書宜不讀武侯無可律吾身能役鎮徐州上元

夜偶作云誰見將軍心似海四更親領萬人遊自負如  
此果軍亂被害上元詩偃王燈塔古徐州二十年來樂  
事休此日將軍心似海四更身領萬人遊又云十萬軍  
城百萬燈酥油香暖夜如蒸紅粧滿地烟光好祇恐笙

歌引上昇

其後死  
於徐州

能鎮徐慕容溥劉巨容周岌俱在麾下數年溥鎮徐  
巨容鎮襄岌鎮許俱假端揆故能詩曰舊將已為三僕  
射病身猶是六尚書

能題後集曰詩源何代失澄清處處狂波汙後生常感  
道孤吟有淚却緣風壞語無情難甘惡少欺韓信枉被  
諸侯殺禍衡縱到緱山也無益四方聯絡盡蛙聲

青春背我堂堂去白髮催人故故生此能詩也然無子  
美大體丰度

鄭谷讀許昌詩集有作云篇篇高且真真為國風陳澹

佇雖師古縱橫得意新剪裁成幾帙

近世詩人遊作  
公篇什最多

唱

和是誰人華岳題無敵黃河句絕倫

韋岳黃河詩序云  
皆二京之內巨題

目也吟殘荔枝雨詠徹海棠春

公有海棠荔枝二首序云杜子美老於兩蜀而無此

詠李白欺前輩

公有寄符郎中云我生若在開元日爭遣名為李翰林

陶潛仰後

塵

公有論詩一章云李白終無取陶潛固不刊

難忘嵩室下

公有嵩山巨篇

不負蜀

江濱

公常從事蜀中者一千集

屬思看山眼冥搜倚樹身楷模勞夢

想諷誦爽精神筆落空追愴曾蒙借斧斤

秋夜旅舍寓懷云夜鎖荒蕪獨夜吟西風吹動故人心

三秋木落半年客滿地月明何處砧漁唱亂松汀鷺合

鴈聲寒咽隴雲深平生只有松堪對露浥霜欺不受侵

許州題德星亭云漢水南流東有堤堤邊亭是武陵溪  
槎松配石堪僧坐藥杏含春欲鳥啼高處月生滄海外  
遠郊山在夕陽西頻來不似軍從事只戴紗巾曳杖藜  
褒斜道中云十驛褒斜到處慵眼前常似接靈蹤江遙  
旋入旁來水山闊猶藏向後峰鳥徑惡時應立虎畬田  
開日自燒松行吟却笑公車役夜發星馳半不逢

曹鄴

鄴能文有特操咸通初為太常博士白敏中卒議謚鄴

責其病不堅退且逐諫臣

懿宗立敏中病足求避位不許補闕王譔奏願聽其請無

使有持寵曠職之譏帝怒斥譔

舉怙威肆行謚曰醜高元裕子璩懿宗

時為相卒鄴建言璩為宰相交游醜雜進取多蹊謚法

不思愛民曰刺請謚為刺

讀李斯傳云欺暗常不然欺明當自戮難將一人手掩得天下目

杏園即席上同年云岐路不在天十年行不至一旦公道開青雲在平地枕上數聲鼓衡門已如市白日探得



珠不待驪龍睡忽忽出九衢僮僕顏色異故衣未及換  
尚有去年淚晴陽照花影落絮浮野翠對酒時忽驚猶  
疑夢中事自憐孤飛鳥得接鸞鳳翅永懷共濟心莫起  
胡越意

鄴字業之大中進士也唐末以祠部郎中知洋州

隣女面上花空床常對影况妾不嫁容甘為瓶墜井句  
右張為取此句洎讀李斯傳杏園上同年詩作主客圖  
老圃堂詩云邵平瓜地接吾廬穀雨乾時手自鋤昨日

春風欺不在就床吹落讀殘書

送人歸南海云數片紅霞映夕陽攬君衣袂更移觴行人莫歎碧雲晚上國每年春草芳雪過藍關寒氣薄鴈迴湘浦怨聲長應無惆悵滄波遠十二重樓非我鄉

右二

章韋莊取  
為又元集

裴虔餘

咸通末虔餘佐北門李公淮南幕

李蔚

嘗遊江舟子判舟

竹篙濺水濕近坐之衣公色變虔餘紀一絕云滿額娥

黃金縷衣翠翹浮動玉釵垂從教水濺羅衣濕知道巫  
山行雨歸公極懽命謳者傳之

陳陶

朝元引四闕云帝燭熒煌下九天蓬萊宮曉玉爐烟無  
央鸞鳳隨金母來賀薰風一萬年

玉殿雲開露冕疏下方珠翠壓鰲頭天鷄唱罷南山曙  
春色光輝十二樓

萬寓靈祥擁帝居東華元老薦屠蘇龍池遙望非烟拜

五色瞳矐在玉壺

寶祚河宮一向清  
龜魚天篆益分明  
近臣誰獻登封草  
五岳齊呼萬歲聲

閑居雜興云一顧成周力有餘  
白雲閑釣五溪魚  
中原莫道無麟鳳  
自是皇家結網疎

又云長壽真人王子喬  
五松山月伴吹簫  
從他浮世悲生死  
獨駕蒼龍入九霄

池塘生春草云謝公遺詠處  
池水夾通津  
古往人何在

年來草自春色宜波際綠香異雨中新今日青青意空  
悲行路人

北夢瑣言云大中年陳陶歌詩似負神仙之術或露王  
霸之說其詩云江湖水清淺不足掉鯨尾又云飲水狼  
子瘦思日鷓鴣寒又云中原不是無麟鳳自是皇家結  
網疎又云一鼎雄雌金液火十年寒暑鹿麕衣又云寄  
語東流任斑鬢向隅終守鐵梭飛諸如此例不可殫紀  
貫休書西人陳陶處士隱居云有叟傲堯日髮白肌膚

紅妻子亦讀書種蘭青溪東白雲有奇色紫桂含天風  
即應迎鶴書肯羨於洞洪又云高步前山前高歌北山

北數載賣柑橙山資近又足

陶種柑橙令  
山童賣之

陶劔浦人居南昌之西山宋齊邱守南昌因有蒲安之  
觀乃自詠云中原莫道無麟鳳自是皇家結網踈與水  
曹任畹郎中友善寄畹詩云好向明時薦遺逸莫教千  
里弔靈均江南後主即位知其運祚衰替以修養為事  
故詩曰乾坤見了文章懶龍虎成來印綬踈嚴尚書宇


鎮豫章遣小妓號蓮花者往西山侍陶陶殊不顧妓為  
詩曰蓮花為號玉為腮珍重尚書遣妾來處士不生巫  
峽夢虛勞神女下陽臺陶荅之曰近來詩思清於月老  
大心情薄似雲已向昇天得門戶錦衾深媿卓文君

陶唐末自稱布衣開寶中人或見之或云已得仙矣蟬  
聲將月短草色與秋長句此屋歌黃竹何人撼白榆句  
右張為取作主客圖

陶題徐穉湖亭云伏龍山橫洲渚地人如白蘋自生死

洪崖成道二千年唯有徐君播青史

方干哭陶詩云雖云掛劍來墳上亦恐藏書在壁中



唐詩紀事卷六十



欽定四庫全書

集部

唐詩紀事卷六十一至  
四

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣陳際龍

欽定四庫全書

唐詩紀事卷六十一

宋 計敏夫 撰

聶夷中

劉象

紀唐夫

羅紹威

鄭仁表

張林

李搏

裴廷裕

高蟾

宋邕

崔塗

孫郃

鄭準

章碣

于濶

聶夷中

夷中有公子行云種花滿西園花發青樓道花下一禾

生去之爲惡草又詠田家詩云父耕原上田子斲山下  
荒六月禾未秀官家已修倉又云二月賣新絲五月糴  
新穀醫得眼前瘡剗却心頭肉我願君王心化作光明  
燭不照綺羅筵只照逃亡屋所謂言近意遠合三百篇  
之正也咸通十二年高湜知舉榜內孤貧者夷中公乘  
億許棠夷中尤貧苦精古詩夷中字坦之咸通中爲華  
陰尉

劉象

鷺鷥詩云潔白孤高生不同頂絲清軟冷搖風窺魚翹  
立荷香裏慕侶低翻柳影中幾日下巢辭紫閣多時凝  
目向晴空摩霄志在潛修羽會接鷺凰別葦叢

象京兆人天復元年與曹松輩同登第號五花榜

象詠仙掌詩時號劉仙掌詩云萬古亭亭倚碧霄不成  
擎亦不成招何如掬取天池水灑向人間救旱苗

### 紀唐夫

開成中執政惡溫庭筠擾場屋黜隨州縣尉唐夫送以

詩曰何事明時泣玉頻  
長安不見杏園春  
鳳凰詔下雖  
霑命鸚鵡才高却累身  
且飲綠醺消積恨  
莫辭黃綬拂  
行塵  
方城若比長沙路  
猶隔千山與萬津

唐夫驄馬云連年出塞踏沙蓬  
豈比當時御史驄  
逐北自諳深磧路  
連嘶誰念靜邊功  
登山每與青雲合  
弄影應知碧草同  
今日虜平將換妾  
不如羅袖舞春風

羅紹威

唐末襲父宏信爲魏博節度使  
喜爲詩江東羅隱有詩

名紹威厚禮之與通屬籍目已所爲詩號偷江東集如  
樓前淡淡雲頭日簾外蕭蕭雨脚風無愧隱矣紹威形  
貌魁偉有英傑氣好招延文學士開館聚書萬卷每歌  
酒宴會與賓佐賦詩頗有情致羅隱贈紹威詩云寒門  
雖得在諸宗棲北巢南恨不同馬上固慙銷髀肉幄中  
猶美愈頭風蹉跎歲月心仍切迢遞江山夢未通深荷  
吾人有知己好將筆力當英雄

鄭仁表

贈美人云嚴吹如何下太清玉肌無疹六銖輕自知不  
是流霞酌願聽雲和瑟一聲

嘗有詩曰文章世上爭開路闕闕山東挂破天仁表經  
過滄浪峽憇於長亭驛吏堅進一板仁表走筆云分陝  
東西路正長行人名利火燃湯路傍著榜滄浪峽真是  
將閑攪撩忙

仁表豪爽有文嘗以門閥文章自高曰天瑞有五色雲  
人瑞有鄭仁表傲縱多所陵藉人畏薄之仕為起居郎為

劉鄴所惡貶死嶺外鄴少時投文於仁表父洎仁表嗤鄙之鄴為相仁表貶死

張林

林擢進士第官至御史為詩小巧多採景於園林亭沼云菱葉乍翻人採後芰荷初沒舸行時亦佳句也林言毀佛寺時御史有蘇監察者檢天下廢寺見銀佛一尺以下者多袖而歸時號蘇捏佛溫庭筠遽曰好對密陀僧



李搏

僖宗在成都廷裕登第搏以詩賀曰銅梁千里曙雲開  
仙錄新從紫府來天上已張新羽翼世間無復舊塵埃  
嘉禎果中君平卜賀喜須斟卓氏盃應笑戎藩刀筆吏  
至今泥滓曝魚鰓既而復譴之曰曾隨風水化凡鱗安  
上門前一字新聞道蜀江風景好不知何似杏園春裴  
有六韻答曰何勞問我成都事亦報君知便納降蜀柳  
籠堤煙矗矗海棠當戶燕霍霍富春不並窮師子濯錦

全勝早曲江高捲絳紗楊氏宅

時主文寓楊子巷故有此句

半垂紅

袖薛濤牕浣花泛鷁詩千首靜衆

寺名

尋梅酒百缸若說

絃歌與風景主人魚是碧油幢

搏登乾符進士第

裴廷裕

廷裕字膺餘昭宗翰林學士左散騎常侍乾寧中在內

庭文書敏捷號下水船後貶湖南卒

梁時姚洎為學士人號急灘頭上水

船

廷裕偶題云微雨微風寒食節半開半合木蘭花看花  
倚柱終朝立却似淒淒不在家

高蟾

詠春詩曰明月斷魂清靄靄平蕪歸思綠迢迢人生莫  
遣頭如雪縱得春風亦不消

金陵晚望云曾伴浮雲悲晚翠猶陪落日泛秋聲世間  
無限丹青手一片傷心畫不成

鄭谷贈詩云張生故國三千里知者惟應杜子微君有

君恩秋葉後可能更羨謝元暉蓋蟾有宮詞云君恩秋  
後葉日日向人疎

蟾初落第詩云天上碧桃和露種日邊紅杏倚雲栽芙  
蓉生在秋江上莫向春風怨未開胡曾亦有下第詩云  
翰苑何時休嫁女文昌早晚罷生兒上林新桂年年發  
不許平人折一枝時謂蟾無躁競心後登第乾符中爲  
中丞

宋邕

一作雍

春日云輕花細葉滿林端昨日春風曉色寒黃鳥不堪  
愁裏聽綠楊宜向雨中看僞蜀韋穀取此詩爲才調集  
唐末五雲溪人范攄云宋雍初無令譽及嬰瞽疾而詩  
名始彰或戲其詩云綠楊宜向雨中看所謂無眼作有  
眼之詩

崔塗

春夕旅懷云水流花謝兩無情送盡東風過楚城蝴蝶  
夢中家萬里杜鵑枝上月三更故園書動多年絕華髮

春唯兩鬢生自是不歸歸便得五湖烟景有誰爭

蜀城春云天涯憔悴身一望一霑巾在處有芳草滿城  
無故人懷才皆得路失計自傷春清鏡不堪照鬢毛愁  
更新塗字禮山光啓進士也

感花詩云繡軔香韉夜不歸少年爭認最紅枝東風一  
陣黃昏雨又到繁花夢覺時

孫郃

邵古意云屈子生楚國七雄知其材介潔世不容跡合

藏蒿萊道廢固命也瓢飲亦賢哉何事塋江水空使後人哀

又云魏禮段干木秦王乃止戈小國有其人大國奈之何賢括信爲美兵甲豈云多君子戰必勝斯言聞孟軻邵字希韓四明人與方干友善乾寧中登進士第好荀楊孟子之書學退之爲文爲校書郎中河南府人學其文爲錢珝所序詩有仕官類商賈終日常東西之句

鄭準

江南清明云吳山楚驛四年中一見清明一改容旅恨  
共風連夜起韶光隨酒著人濃延興門外攀花別採石  
江頭帶酒逢無限歸心何計是路邊戈甲正重重準以  
文依荊州成中令汭常欲比肩陳阮自作所業爲三卷  
號劉表軍書其應舉日詩卷有題水牛云護犢橫身立  
逢人揭尾跳朝士大笑字不欺登乾寧進士第有渚宮  
集一卷

章碣



癸卯歲毗陵登高云流落常嗟勝會稀故人相遇菊花  
時鳳笙龍笛數巡酒紅樹碧山無限詩塵土十分歸舉  
子乾坤大半屬偷兒長楊羽獵須留本開濟重爲闕下  
期

焚書坑詩曰竹帛煙銷帝業虛關河空鎖祖龍居坑灰  
未冷山東亂劉項元來不讀書

上元夜建元寺觀燈呈通智上人云建元看別上元燈  
處處回廊闕火層珠玉亂拋高殿佛綺羅深拜遠山僧

臨風走筆思呈惠到曉行禪合伴能無限喧闐留不得  
月華西下露華凝

邵安石連州人高湘侍郎南遷歸闕途次連江安石以  
所業投獻遂挈至輦下湘主文安石擢第碣賦東都望  
幸刺之曰懶修珠翠上高臺眉月連娟恨不開縱使東  
巡也無益君王自領美人來

碣孝標之子登乾符進士第碣未第時方干贈詩織錦  
雖云用舊機抽梭起樣更新奇何如且破望中葉未可

便攀低處枝藉地落花春半後打牕斜雪夜深時此時  
才子吟應苦吟苦鬼神知不知

于瀆

辛苦吟云隴上扶犁兒手種腹長飢牕下擲梭女手織  
身無衣我願燕趙姝化爲嫫女姿一笑不直金自然家  
國肥

古宴曲云雉扇合蓬萊朝車迴紫陌重門集嘶馬言宴  
金張宅燕娥奉卮酒低鬟若無力十戶手胼胝鳳凰釵

一隻高樓齊下視日照綺羅色笑指負心人不信生中國

思歸引云不耕南畝田誤愛東堂桂身同樹上花一落  
又經歲交親日相薄知己思潛替日開十二門自是無  
歸計瀆字子漪咸通進士終泗州判官

唐詩紀事卷六十一

欽定四庫全書

唐詩紀事卷六十二

宋 計敏夫 撰

鄭嵎

津陽門詩云華清宮之外闕南局禁闈北走京道開元  
中嵎常得群書下帷於石甕僧觀而甚聞宮中陳跡焉  
今年冬自虢而來暮及山下因解鞍謀食求客旅邸而  
主公年且艾自言世事明皇夜闌酒餘復爲嵎道承平  
故實翌日於馬上輒裁刻俚叟之話爲長句七言詩凡

一千四百字成一百韻止以門題爲之目云耳

津陽門北臨通遠雪風獵獵飄酒旗泥寒軟段蹶不進  
疲童退問前何爲酒家顧客催鮮裝案前羅列樽與卮  
青錢瑣屑安足數白醪軟美甘如飴開爐引滿相獻酬  
枯腸渴肺忘朝飢愁憂似見出門去漸覺春色入四肢  
主翁移客挑華燈雙肩隱膝烏帽歌笑云鮑老不爲禮  
飄蕭雪鬢霜垂頤問余何往凌寒曦顧翁枯朽郎豈知  
翁曾豪盛客不見我自爲君陳昔時時平親衛號羽林

我纔十五爲孤兒射熊搏虎衆莫敵彎弧出入隨欣飛

開元中未有東西神策軍但以六軍爲親衛

此時初創觀風樓簷高百尺堆

華櫓樓南更起鬪鷄殿晨光山影相參差

觀風樓在宮之外東北隅

屬陝城而連上內前臨馳道周視山川寶應中魚朝恩毀之以修章敬今遺址尚存唯鬪鷄殿與毬場迤邐尚在  
其年十月移禁仗山下櫛比羅百司朝元閣成老君

見會昌縣以新豐移

時有詔改新豐爲會昌縣移自陰鰲故城置于山下至明年十月老

君見于朝元閣南而於其處置降聖觀復改新豐爲幽  
昭應縣廨宇始成令大將軍高力士率禁樂以落之  
州曉進供奉馬玉珂寶勒黃金羈

安祿山每進馬必殊特而極銜勒之飾



五王扈駕夾城路傳聲校獵渭水湄六軍各出射絡野

張置維彫弓繡韞不知數翻身滅没皆娥眉赤鷹黃鵠

雲中來妖狐狡兔無所依人煩馬殆禽獸盡百里腥膻

禾黍稀

申王有高麗赤鷹岐王有北山黃鵠逸翮奇姿特異他等上愛之每弋獵必置於駕前目為決

勝兒暖山度臘東風微宮娃賜浴長湯池刻成玉蓮噴香

液漱迴烟浪深逶迤

宮內除供奉兩湯池內外更有湯十六所長湯每賜諸嬪御其修廣

與諸湯不侔甃以文瑤寶石中央有玉蓮捧湯泉噴以

成池又縫綴綺繡為鳬雁於水中上時於其間泛銀鏤  
小舟以嬉游焉犀屏象薦羅列錦鳬繡鴈相追隨破簪碎鈿

不足拾金溝殘溜和纓綫上皇寬容易承事十家三國

爭光輝統床呼盧恣樗博張燈達晝相謾欺相君侈擬

縱驕橫日從秦虢多游嬉朱衫馬前未滿足更驅武卒

羅旌旗

楊國忠爲宰相帶劍南節度使常與秦虢聯轡而出更於馬前以兩川旌節爲導也

畫輪

寶軸從天來雲中笑語聲融怡鳴鞭後騎何躑躅宮粧

禁袖皆仙姿青門紫陌多春風風中數日殘春遺驪駒

吐沫一奮迅路人擁篲爭珠璣

事盡載在國史中此下更重叙其事

八姨

新起合歡堂翔鷗賀鶯無由窺萬金酬工不肯去矜能

恃巧猶嗟咨

魏國創一堂價費萬金堂成工人償價之外更邀賞伎之直復受絳羅五千段工者

嗤而不顧魏國異之問其由工曰某生平之能殫於此笑苟不知信願得蝼蟻蜥蜴蜂蠆之類去其目而投於堂中使有間隙得失一物即不論工直也於是又以繒絲珍貝與之山下人至今話故事者尚以第行呼諸姨

馬

四方節制傾附媚窮奢極侈沽恩私堂中特設夜明

枕銀燭不張光鑒帷

魏國夜明枕置於堂中光燭一室西川節度使所進事載國史畧書

之瑤光樓南皆紫禁梨園仙宴臨花枝迎娘歌喉玉窈

窕蠻兒舞帶金歲蕤

瑤光樓即飛霜殿之北門迎娘蠻兒乃梨園弟子之名聞者

三

郎紫笛弄烟月怨如別鶴呼羈雌玉奴琵琶龍香撥倚

歌促酒聲嬌悲

上皇善吹笛常寶一紫玉管貴妃妙彈琵琶其樂器聞於人間者有邏逤檀爲槽龍

香栢爲撥者上每執酒卮必令迎娘歌水調曲遍而太真輒彈絃倚歌爲上送酒內中皆以上爲三郎玉奴乃

太真小字也

飲鹿泉邊春露晞粉梅檀杏飄朱墀金沙洞口

長生殿玉蕊峰頭王母祠

山城內多馴鹿流澗號爲飲鹿有長生殿乃齋殿也有事

於朝元閣即御長生殿以沐浴也

禁庭術士多幻化上前較勝紛相持

羅公如意奪顏色三藏袈裟成散絲

上頗崇羅公遠楊妃尤信金剛三藏

上嘗幸功德院將謁七聖殿忽然背痒公遠折竹枝化作七寶如意以進上大喜顧謂金剛曰上人能致此乎三藏曰此幻術耳僧爲陛下取真物乃於袖中出如意七寶炳耀而公遠所進即時復爲竹枝耳後一日楊妃

始以二人定優劣時禁中將創小殿三藏乃舉一鴻梁  
於空中將中公遠之首公遠不爲動容上連命止之公  
遠飛符於他處竊三藏金欄袈裟於簾中守者不之見  
三藏怒又咒取之須臾而至公遠復嘆水龍符於袈裟  
上散爲絲縷以盡也蓬萊池上望秋月無雲萬里懸清輝上皇夜

半月中去三十六宮愁不歸月中秘樂天半間丁璫玉

石和埧簾宸聰聽覽未終曲却到人間迷是非

葉法善常引上

人入月宮時秋已深上苦淒冷不爲久留歸於天半間  
尚聞仙樂及上歸且記憶其半遂於笛中寫之會西梁  
都督楊敬述進婆羅門曲與其聲調相符遂以月中所  
聞爲之散序用敬述所進曲作其腔而名霓裳羽衣法  
曲千秋御節在八月會同萬國朝華夷花萼樓南大合

樂八音九奏鸞來儀都盧尋橦誠齷齪公孫劍伎方神

奇馬知舞徹下牀榻人惜曲終更羽衣

上始以誕聖日為千秋節每大

酺會必於勤政樓下使華夷縱觀有公孫大娘舞劍當時號為雄妙又設連榻令馬舞其上馬衣純綺而被鈴鐸驤首奮鬣舉趾翹尾變態動容皆中音律又令宮妓梳九綺仙髻衣孔雀翠衣佩七寶瓔珞為霓裳羽衣之類曲終珠翠可掃其舞馬祿山亦將數疋以歸而私習之其後田承嗣代安有存者一旦於廐上聞鼓聲頻挫其舞廐人惡之舉篲以擊之其馬尚為怒未妍妙因更奮擊宛轉曲盡其態廐恐以告承嗣以為妖遂戮之而舞馬自祿山此時侍御側金鷄畫障當罽繡羽衣祿此絕矣

日負鼎甘言狡計愈嬌癡

上每座及宴會必令祿山坐於御座側而以金鷄障隔之

賜其箕踞太真又以爲子時襁褓戲而加之上亦呼之  
祿兒每入宮必先拜貴妃然後拜上笑而問其故輒對  
曰臣本番中人禮先拜  
母後拜父是以然也  
詔令上路建甲第樓通走馬如

飛輦大開內府恣供給玉缶金筐銀簸箕

時於親仁里南陌爲祿山

建甲第令中貴人督其事仍謂之曰卿善爲部署祿山  
眼孔大勿令笑我至於箒筐簸箕缶之具咸金銀爲  
之今回元觀  
即其故第耳  
異謀潛熾促歸去臨軒賜帶盈十圍  
祿山肥博

過人腹垂而緩帶  
十五圍方周體

忠臣張公識逆狀日日切諫上弗疑

張曲江先識其必反逆狀數數言於上上湯成召浴果  
曰卿勿以王夷甫識石勒而誤疑祿山爾

不至潼關已溢漁湯師御街一夕無禁鼓玉輅順動西

南馳

其年賜柑子使回泣訴祿山反狀云臣幾不得生反上猶疑其言復遣使喻云我爲卿造一湯待卿

至使回荅言反狀上然後九門回望塵空多六龍夜馭

憂疑即冠軍已至潼關矣

兵衛疲縣官無人具軍頓行宮徹屋屠雲螭

時郊畿草擾無御頓

之備上命徹行宮木宰御馬以饗士卒

馬嵬驛前駕不發宰相射殺冤者

誰長眉鬢髮作凝血空有君王潛涕洟青泥坂上到三

蜀金堤城邊止九旂移文泣祭昔臣墓度曲悲歌秋鴈

辭駕至蜀詔中貴人馳祭張曲江墓悔不納其諫又過

劍閣下望山川忽憶水調辭云山川滿目淚沾衣富

貴榮華能幾時不見只今汾水上唯有年年秋雁飛上注然流涕顧問左右曰此誰人詩從臣對曰此李嶠詩

欽定四庫全書

唐詩紀事

六



復掩泣曰李嶠  
真可謂才子也

明年尚父上捷書洗清觀闕收封畿兩

君相見望賢宮君臣鼓舞皆歔歔

望賢宮在咸陽之東數里時車駕自蜀回

肅宗迎駕上皇自致傳國璽於上上歔歔拜授左右皆泣曰不圖今日復觀兩君相見之禮駕將入開遠門上皇疑馬上先後入門不決顧問從臣不能對高力士前曰上皇雖尊人臣也皇帝雖子主也上皇偏門而先行皇帝正門而入後行者老皆呼萬歲當時皆是之宮中親呼高驃騎潛令改塋

楊真妃花膚雪艷不復見空有香囊和淚滋

時肅宗詔令改塋太

真高力士知其所瘞在鬼坡驛西北十餘步當時乘輿忽遽無復備周身之具且以紫縵裹之及改塋之時皆已朽壞惟有胸前紫繡香囊中尚得鑿與却入華清宮冰麝香持以進上皇上皇泣而佩之

滿山紅實垂相思飛霜殿前月悄悄迎春亭下風颼颼  
飛霜殿即寢殿而白傅長憾歌以長生殿為寢殿殊誤  
矣上皇至明年復幸華清宮信宿乃回自此遂移處西  
內中  
雪衣女失玉籠在長生鹿瘦銅牌垂象牀塵凝罨  
矣

颯被畫檐蟲網頗梨碑

太真養白鸚鵡西國所貢辨慧多辭上尤愛之字為雪衣女上

常於芙蓉園中獲白鹿惟山人王旻識之曰此漢時鹿  
也上異之令左右周視之乃於角際雪毛中得銅牌子  
刻之曰宜春苑中白鹿上由是愈愛之移於北山目之  
曰山客上止華清殿颯公主嘗為上晨召聽按新水調  
主愛起晚遽遺真珠被而出及寇至倉惶隨駕出宮後  
不知省及上歸南內一旦再入此宮當時颯之被宛  
然而塵積矣上尤感焉溫泉堂碑其  
石瑩徹見人形影宮中號為頗梨碑  
碧菱花覆雲母陵

風篁雨菊低離披真人影帳偏生草果老藥堂空掩扉

真人李順興後周時修道北山神堯皇帝授禪真人潛告符契至今山下有祠宇宮中有七聖殿自神堯至睿宗所植俱擁腫矣南有功德院其間瑤壇羽帙皆在焉順興影堂果老藥室亦在禁中也鼎湖一日

失弓劒橋山烟草俄霏霏空聞玉枕入金市但見銅壺

飄翠帷開元到今踰十紀當初事跡皆殘隳竹花唯養

棲梧鳳水藻周游巢葉龜會昌御宇斥內典去留二教

分黃縹慶山汙渚石甕毀紅樓綠閣皆支離奇松恠柏

爲樵蘇童山智谷亡嶮巖煙中壁碎摩詰畫雲間字失

玄宗詩

持國寺本名慶山寺德宗始改其額寺有綠額復道而上天后朝以禁臣取宮中制度結構之

石甕寺開元中以創造華清宮餘材修繕佛殿中玉石像皆幽州進來與朝元閣道像同日而至精妙無比叩

之如磬餘像並楊惠之手塑肢空像皆元伽兒之制能妙纖麗曠古無儔紅樓在佛殿之西巖下臨絕壁樓中有玄宗題詩草八分每一篇一體王右丞山水石魚巖兩壁寺毀之後皆失之矣摩詰乃王維之字也

底百尋井銀床下卷紅綆遲當時清影蔭紅葉一旦飛

埃埋素規

石魚巖下有天絲石其形如甕以佇飛泉故上以石甕爲寺名寺僧於上層飛樓中縣轆

轆叙引修竿長二百餘尺以及甕泉出於紅樓喬樹之杪寺既毀拆石甕今已埋沒也

韓家燭臺

倚林杪千枝燦若山霞摘昔年光彩奪天月昨日銷鎔

當路岐

韓國爲千枝燈臺高八十尺置于山上每至上元夜則燃之千光奪月凡百里之內皆可望焉

龍宮御榜高可惜火焚牛挽臨崎峴孔雀松殘赤琥珀

鴛鴦瓦碎青琉璃

寺額睿宗在藩邸中所題也標於危樓之上世傳孔雀松下有赤茯苓入

土千年則成琥珀寺之前峯古松老柏洎乎嘉草今皆樵蘇蕩除矣今我前程能幾許徒

有餘息筋力羸逢君話此空灑涕却憶歡娛無見期主

翁莫泣聽我話寧勞感舊休吁嘻河清海宴不難覩我

皇已上昇平基湟中土地昔湮沒昨夜收復無瘡痍戎

王北走棄青塚虜馬西奔空月支兩逢堯年豈易偶願

翁頤養豐膚飢平明酒醒便分首今夕一樽翁莫違

唐詩紀事卷六十二